

四庫全書

史部

欽定四庫全書

史部

畿輔通志卷八十一至五

詳校官監察御史臣劉人祿

檢討臣德生覆勘

總校官進士臣繆琪

校對官中書臣葉蘭

謄錄監生臣曹方昇

欽定四庫全書

畿輔通志卷八十一

卓行

正定府

南北朝魏

石祖興

常山九門人常出勞絹二百餘疋營護太守
田文彪縣令和真等喪事孝文嘉之賜爵二

級為上造後
拜寧陵令卒

唐

李知本

元氏人事親篤至與弟知隱雍順子孫百餘至賢用僮僕無間也隋大業末盜賊過閭不

入相戒曰無犯義門往依者五百餘室皆以免貞觀初為夏津令

甄逢

無極人濟之子幼而孤及長耕宜城野自力讀書不謁州縣節用以給鄉里以義聞逢常

以父名不得在國史欲詣京師自言元和中袁滋表濟節行詔贈秘書少監而逢與元稹善稹為移書於史館韓愈由是父子俱顯名

元

朱顯

真定人自至元中其祖父已分財顯念姪彦昉等年幼無恃謂弟耀曰父子兄弟本同一

氣可異處乎乃令拜祖墓下取分券焚之復與同居

張

慶

真定人善事繼母伯父泰異居河南迎歸養之載元史孝友傳

明

畢

鸞

井陘人父貴莒州學正卒於官鸞幼家貧不能扶觀葉葬於莒家業荒落晝耕夜讀奉母

撫弟孝友備至母卒哭踊幾絕哀經銜衣徒步至莒負父骨歸而合葬廬墓側有馴鹿伴蛇之異詔旌表其門後舉正統進士授御史

李

皚

無極人母亡廬墓有湧泉白鳩之異成化中旌表

張

弼

無極人幼喪父事母至孝凡出外得供母之具必首負而歸母喪廬墓榆錢九月發生咸

以孝感所至嘉靖中旌表

邵祥

行唐人有孝行為博野令未任聞父病即馳歸日夕侍側湯藥必嘗稽顙顙天求以身代

及卒哀毀過節因卒於塋

許諮

井陘人邑庠生有孝行一夕聞叩扉聲啟之一青衣人曰願寄銅馱倏忽不見發視之皆

銀也銀上有字云帝嘉孝子乃錫以銀遠近傳以為異

張民望

井陘人邑庠生事親有孝行萬歷中巡按題請旌表

許自嚴

井陘人萬歷拔貢性醇厚壯年無子妻馮密買一女為妾自嚴詢知其貧遣還之聘金亦

不問鄉人趙國棟高隆門負債將鬻妻子以償自嚴聞即召至焚其券歲飢捐粟賑濟全活甚衆官

至陝西臨洮府通判

劉自晉

井陘人處士孝悌淳厚賑貧助葬設義學置義塚德及鄉里以子應中貴贈湖廣武昌同

知

張一成

井陘人天啟中弟一明毆死鄉人于來友將抵於法孀母憐其少子痛甚一成詣縣哀懇

乞代監禁二十三載後蒙赦免且見五世孫

本朝

柳枝楊

靈壽人幼喪父事母盡孝母沒廬墓三年不通家人往來順治二年按院旌其閭

杜維喬

晉州人天性至孝母病湯藥必嘗每夜稽顙顯天乞以身代頭額盡裂閭里稱之順治二

年

旌表

楊先烈

正定人幼孤事母至孝先意承志家貧甘旨不缺母沒哀毀泣血廬墓三年康熙年

旌表

茹顯相

晉州人年七歲母故孝事繼母劉氏及父歿奉養尤謹歷三十三年未嘗稍懈雍正三年

旌表

郭見忠

平山人農官郭芝蘭子路拾晉客張其級遺金一百五十餘兩尋訪給還其級願分銀謝

旨准給

之堅拒不受雍正六年奉八品頂帶賞銀五十兩

順德府

漢

郭

巨

內邱人事母至孝有一子巨母甚愛之每食輒分甘焉巨與妻謀埋其子以專母養鋤土

得黃金
一釜

明

楊

述

邢臺人洪武中任歸安令陞兵馬指揮使事父母孝敬飲食必親奉以進愉色婉容終身

勿懈至今
人猶傳誦

毛

玘

任縣人天順進士授蒙陰令母久失明迎養官舍旦夕祝天母目復明尋解組歸

馬

麒

順德人少質實有奇節成化時舉人漳水暴決平地丈餘父恭厄於水不知所在麒號泣

水次偶得小舟遽登求之衆為危懼麒曰吾為父死死亦何恨忽大風飄泊抵大樹下父在樹上已

絕食三日兩全而歸人謂
孝感後除封邱令有循聲

阮

珩

字國用順德人為諸生事親至孝暇日究心
理學不求仕進親喪屏酒肉三年哀毀不已

形羸骨立弘治時提學
藩府為四難詩以贈之

謝時鳴

任縣人性孝友樂施既食饌每戒家人作飯
以供族人之往來城邑者或問之曰此君恩

也焉敢私後為淄川訓每戒諸生曰詩書
是為聖賢榜樣非藉此求富貴也卒於官

霍玉

任縣人幼孤母陳氏老而多疾玉廣求醫藥
治之凡飲食必躬自執爨數年不懈既而母

脫齒不能食復求乳以奉之至
玉領鄉薦母始沒未仕而卒

霍守忠

任縣人性至孝親沒哀毀幾絕廬於墓側晝
夜泣拜者三年正德中詔旌其門曰孝行

劉準

唐山人邑諸生父喪廬墓野燒將及準悲號而火止正德中旌表

逯

相

廣宗人邑庠生嘉靖中母楊氏病沒相哀痛悲號既掩壙廬墓三年躬荷鍤器負土築墳

時大水漂沒獨不沒廬遠近咸以為異

杜宗壽

字子靜任縣人官鴻臚寺序班甫一年以母老乞終養世宗降旨褒之踰九年母歿復起

為長子丞多惠政不忍以敲朴催科遂致仕歸居鄉樂善好施鄉人皆稱祭酒云

陳

愿

字從志任縣人為諸生博洽蘊藉有文名九試不第事父母愛敬備至親歿廬墓側朝夕

號泣甘旨不入口者三年喪畢猶不忍去縣令及鄉士大夫敦請之始歸齋前忽生一草色白味香狀如雲識者以為靈芝嘉靖中建錫類坊旌之

賀世祿

任縣人由縣令累官至長史先姓陳及繼父歿復姓迎養生母以孝聞

趙智

鉅鹿人與弟慧並有孝行盜至將殺其母智與慧爭代死賊俱釋之

陳易泰

任縣人為諸生性至孝父母歿皆茹素廬墓三年負土築墳悉躬親之朝夕薦享涕泣哀

慕聞者感惻

潘成家

任縣人事母盡孝遇宴會有新果時蔬如母未嘗弗食也親有怒百計以解釋而後止直

指使者兩旌其孝行焉

本朝

智懷行

內邱人邑諸生少貧傭以養親父病瘟思甘泉時久旱澤涸非數里外不可得而懷行侍

父不敢離拜求於家之舊井清泉迸溢咸謂孝感所致嫂沒遺孤幼令妻乳之己子以分乳死無怨言崇禎末流寇迫城下懷行以母兄在外欲出城守陴者嘉其志殊書票與之懷行累票絕城而下為寇所獲今袒胷受刺見票攜以見帥帥視票壯之問懷行城中有兵否曰有糧多否曰多乃還票且授以矢令得出營既出行數里得母驚喜仆地扶入郭復往尋兄兄方縛樹受射懷行伏地請代得并釋賊以城中饒兵糧解圍去蓋見懷行貌質厚信其語也懷行既全母兄並救一邑生靈云後親歿廬墓三年順治十七年學使熊伯龍題請

旌表邑令邵嗣堯

為之傳

趙

慼

字子靜唐山人以父廕官商河令棄官歸先是丁母憂廬於墓斷暈酒不沐不剃髮積泥

世祖

章皇帝旌其閭有孝子碑
垢徑寸服闋頭至不可剃父喪亦如之

劉漢儒

廣宗人襁褓時父鍾以明末兵荒流至關東再娶梁氏生子蒲病沒音問不通者二十年

後漢儒聞父歿奔喪值梁氏亦故哀稟主人情詞慘切主為動容許之與弟分負兩骸徒步千里歸

與己母並合葬焉

蘇奇英

廣宗人明末大飢父榮啟就食山左鉅野縣之宋家莊死焉奇英求之不得晝夜號泣聲

徹原野遇一老人指其處嚙指血滴骨負骸歸葬邑令旌其門曰孝婉少元

樂養重

任縣人天性醇樸國初父一選遇寇將殺之養重跪泣哀懇請以身代寇憐其孝兩釋

之將析產盡讓之伯仲一無所爭年逾耄耄不識城市子玉柱為諸生

趙光正

任縣人幼年喪父即知哀慕每食必薦過墓必哭拜而後去事寡母高氏極盡誠孝雖糲

食必婉容以進其他輕財尚義樂善好施居鄉尤多善行邑令屢旌其門

鹿遇明

南和人順治甲午舉人善事繼母奉寡嫂撫孤姪以孝友聞官國子監助教卒祀鄉賢

廣平府

北魏

宋

瓊字普賢廣平列人人少以孝行稱母曾病季秋思食瓜瓊夢想見之求而遂獲母終屢辟

不就子仲美尚書水部郎

唐

馬

衡

貝州人

章

徵

邯鄲人

馮仁海

雞澤人

郭守素

雞澤人 四人皆事親居喪著至行者天子旌表門閭賜粟帛州縣存問復賦稅

宋

田

祚

貝州人 十世同居詔旌表門閭

李

玘

宗城人 力耕事母母卒讓田與弟遂廬於葬所負土築墳高丈餘又以二代及諸族父母

蒙葬者盡禮築之凡六墳皆丈餘復留守墳三年天禧中太守張知白以狀聞詔賜粟帛令府縣安

存之

金

劉

政

洺州人性篤孝母喪明每以舌舐母目遂能視母疾刲股肉啖之者再三母死負土起墳

葬之日飛鳥哀鳴翔集邱木間廬墓

三年防禦使以聞除太子掌飲丞

王

禧

永年人世業農歲得麥萬石號萬石王家金末入財佐軍興補進義副尉元兵破永年將

屠其城禧復罄家貲以助軍費衆賴以免

元

龐

遵

永年人母病睡三年不起思食鯉遵求於市不得歸途歎恨忽有鯉躍入舟作羹以獻母

悅而病瘥

明

張憲

成安人為諸生父母歿並廬墓三年每哭泣烏鵲羣繞哀鳴景泰中旌表

傅海

咸縣人父喪廬墓虎至叱之曰我為父母生死何惜虎即去景泰中旌表

劉憲

字君式永年人庠生入太學親歿廬墓三年致白兔馴鳩之異事聞旌表詔賜八品文職

優其身以終

本朝

滕運昌

清河人父病膏肓自甘母患心悖停燈夜伴五年勿倦母性嗜雞及沒見雞則悲終身不

食順治六年

旌表

張韞秀

清河人七歲父沒遺言以讀書為孝韞秀每對書輒感泣稍長從兄受業年十三補弟子

旌表

員篤於孝友鄉黨稱之順治間

高一相

清河人事父至孝每事善體親晨昏定省甘旨不缺父病疇於神願傾家脩街葺廟父遂

痊愈順治間

旌表

張潛

磁州人前大司馬鏡心之子順治己丑進士授內弘文院庶吉士手輯司馬雲隱堂集三

十卷擲節衣食之費拮据六載梓以行世中年失偶念妻封股療姑一生盡孝終身不再娶人服其

義康熙三十年祀鄉賢

安居

曲周人邑庠生父明國病沒居廬墓三年日夜哀思年未四十鬚髮盡白家貧事母曲盡

甘旨閭里稱為純孝康熙九年

旌表

路允升

曲周人康熙壬戌進士翰林院檢討性純孝父沒哀慟不已竟以疾卒康熙三十二年

旌表祀鄉賢

逯

韜

成安人處士事親克致孝養所置產與諸弟共之不一錢以仁讓化人終其身里黨無

爭訟者尤務實學於朱程之旨多所發明康熙四十四年祀鄉賢

任培元

邯鄲人性至孝父歿哀毀幾絕既葬結廬墓側三年乃歸家貧母老人有貸之資本使貿

易以養者培元力辭與弟躬耕奉養甘旨不缺雍正三年

旌表

楊進朝

磁州人務農為業路獲銀四十兩錢三千文守之不去失主至如數還之雍正七年奉

准給八品頂帶賞銀三十兩

大名府

隋

華

秋

汲郡臨河人幼喪父傭賃以養母母終廬於墓側負土成墳縣大獵有兔奔秋廬中匿其

膝下自後此兔常馴宿焉郡縣具以狀聞帝降使勞問表其門閭後羣盜起往來閭之左右咸相誠

曰勿犯孝子鄉賴以全者甚衆

唐

杜

羔

相州洹水人貞元初及進士第父任河北尉死母更兵亂不知所之羔憂號終日會從兄

兼為澤潞判官鞠獄有媪對簿庭下羔旁觀媪見之出語人曰適見少年貌類吾夫羔聞訊之乃母也迎歸奉養而不知父墓區處舍佛寺見柱間有數行字乃父臨死記墓所在羔奔往亦有耆老識其隴因得葬元和中為萬年令歷振武節度使謚敬

谷感德

南樂人

毛

仁

魏縣人

李文綢

臨河人皆事親居喪著至

行者天子旌表門閭賜粟帛州縣存問復賦稅

宋

鄧仲和

字祖德長垣人舉三禮親喪廬墓定省往來如事生者二十年負土累墳高三丈

元

李

茂

大名。人徙家揚州。父興壽臨卒語茂曰。爾善事母。茂泣受命。奉母甚謹。母病目失明。禱於

泰安山三年。復明。每夜祝天乞損己年。益母。母至八十四而卒。居喪哀慟。聞者傷之。大德九年。揚州火延燒千餘家。及茂廬風返而滅。事聞旌之。

元

善

大名。人父有昆弟五人。因貧流散江淮。客死至大四年。善往尋其骸骨。并迎弟姪等二十

五喪而歸。改葬祖父母。以諸喪序列。祔於塋。次州縣以聞。旌其家。

明

康

祥

南樂人。母患瘋疾。晨夕虔禱。遂愈。繼患癰。又禱。願以身代。忽偏體皆癰。母亦愈。及卒。負土

成墳廬其側。三年宣德中旌表。

楊鐸

南樂人養母至孝及卒廬墓三年身容毀瘁宣德中旌表

魏大賢

元城人正統六年歲飢出豆麥一千石助賑勅賜獎諭仍旌其門

甘澤

開州人正統進士以純孝稱自兒時若成人能以色養歷官御史與武清侯石亨不協外

謫天順改元召還聞父訃徒跣三百餘里歸葬與弟潤俱廬墓三年澤卒潤居母郝喪亦廬墓三年

弘治中並旌表

侯英

字世傑開州人天順進士歷官江西按察僉事母喪與弟侃俱廬墓三年有白鳥數千繞

樹成化中旌表

馬宗範

開州人國子生父喪廬墓盜不敢犯弘治中旌表

王

鼎

長垣人爲諸生父喪廬墓有白蛇烏鳥之祥弘治中旌表後官至浙江僉事

唐

勉

長垣人性純篤受人侮不與較或問之答曰吾父母早逝與較必爭爭必致罵詈及親是

重吾不孝也年七十餘卒其子孫至今猶多紳絃云

侯

俊

長垣人父疾晝夜不解衣帶籲天求以身代父尋愈人稱爲真孝子

孟

諒

長垣人母卒負土成墳廬居三年有司欲以聞諒止之曰人子事也何足異後入太學官

濟寧州判

趙君輔

長垣人家貧夫婦耕織日市餅肉僅足供母即凶歲不少缺母卒哀毀廬墓三年

劉

珂

字伯璿開州人少孤事母至孝登嘉靖進士未授官即上疏乞終養呂柟贈以詩有曾子

終能傳一貫孝經
真脉未嘗差之句

侶鶴舉

字健翎清豐人崇禎進士任黃州府推官父
艱奔里兩日旋丁母艱結廬墓側朝夕環泣

甫三日兵至家人請避去鶴舉曰生不能恒奉顏
色何忍棄抔土遂中流矢展轉死於墓側弟舉人
鴻舉併死之兵科
傳振鋒疏請旌表

本朝

崔九圍

長垣人順治初奉母并妻子館從祖濬縣教
諭署中庚寅寇至持刃脇其母九圍突前救

護以頭觸壁身受三刃髮截指落瀕死復甦母賴
以全妻劉氏竟被殺死後登辛邨鄉試官白水令
以子蔚林貴
封侍讀學士

閔祚茂

祚盛

長垣人黃河水決茂盛奉母至劉家口舟覆母沒於水二人呼天叫號同

奮躍入出沒波濤間者數里竟負母而出母子皆無恙云方入水時如有物憑焉者人以為孝感所

致云

于世俊

長垣人父南極為于光宗毆死俊時年幼欲報未能乃礪刃以俟越數年過於酒家誘之

醉碎其首投縣願抵令嘉其孝詳請釋免

李立春

南樂人孝行純至父母沒俱廬墓三年康熙三年

旌表建坊

魏體仁

南樂人貢生官永清訓導性至孝母谷患癰症侍奉十三年未嘗解衣而寢父歿庶母楊

諭

祭執

氏羅氏皆從死比葬族人以祖塋屢蒙

妄不從葬之說相難體仁以雙烈殉節惟願相從

地下倘不附葬既辜雙烈苦心亦重傷父意乃別

建新塋附葬焉識者咸以為當體仁尚風節嚴取

予邑令田慶曾重其人貽金五十以資膏火辭曰

生雖貧廩糧館穀可供朝夕不敢拜嘉惠竟不受

善松雪書法能詩為王阮亭申鳧盟諸前輩所稱

許著有一枝堂詩集客吟續稿康熙五十三年祀

鄉賢子嶠順
治丙戌進士

宣化府

金

殷

禮

宣德人性至孝鬻薪自給顧日求甘旨奉親
貞祐中元兵陷宣德下令盡殺老者禮念父

必不免乃伏其父於身下自以兩手據地引頸就刃項腦中二刀幸不死後二日復下令無老幼盡殺會禮以善舞被選已行至蔚州矣聞父死潛歸求屍得之負以涉河水傷脛至血出發母塚下屍封識之後以功得漢軍千戶子尚古尚質皆至顯官

明

胡

厥

宣府人父母歿結廬墓側晨昏哀奠不輟又自負土為塋植木成林三年成大塚監司上

其事詔旌之

宗

疆

懷安人嘉靖己酉母韓氏歿廬墓三年泣血未嘗見齒父虎病卒復哀毀如母喪

王國勲

開平衛人由指揮同知歷遷總兵官父歿請如文臣例終制不許毀瘠幾不勝喪事繼母

葛盡孝終身如一日雅重儒術士大夫翕然稱之

王

全

開平衛人父卒哀毀甚穴地墓傍以居躬伐薪陶甕誓完父墓其母兄往視則相見哭妻

來供饘粥則避云

張

榮

龍門所人幼而喪母哀毀如成人事繼母姚言動無乖忤姚色稍不豫榮即自悲酸姚亦

和容以待視之不啻如已出父歿未窆隣失火將延其家榮傾貲求人舁棺而號曰天乎何酷我父若此條風反火息貲亦不損人以為孝感云

王道成

保安衛人性至孝母病侍奉湯藥寢食俱廢及歿哀毀逾禮勞瘁病卒妻李氏亦絕粒以

殉事聞詔旌其門並立祠祀之

杜

璽

萬全右衛人以貢入太學父歿祭葬如禮將為廬墓計或勸之曰如邊患何璽曰天果欲

死吾雖城居焉避竟守廬三載乃還

劉長治

懷來衛庠生父孔英任大同衛經歷歸闕逆之變索勒紳宦助餉非刑追比孔英匿山中

捕之急長治挺身代父拷掠備至瀕死者數四會賊敗乃免直指旌其門

本朝

李

浚

字宣明西寧人貢生任新河訓導有孝行父歿哀泣廬墓有嘉禾之感英王西征浚嘗

以二千金輸助軍需其他倡義急公類如此順治二年祀鄉賢

李

濬

字文明西寧人由庠生入太學父齊松宦蜀留事祖母克盡孝養尤慷慨有義行順治初

大同鎮帥首亂從弟源與其母俱陷圍城濬以芻
粟助官軍且奉牛酒犒師因達其衷弟與母賴以
無恙罪人既得脩城掩骼招集流亡後歸里築洋
河護隄成桑乾浮梁行義益力弟潁字亘明順治
甲午武舉會邑中旱災巡撫于成龍就賑粟不繼
潁請効汲長孺故事暫借倉儲至秋請償成龍大
喜從其言所活數萬人

康熙初兄弟並祀鄉賢

李雲華

蔚縣人為諸生事親至孝親歿每設祭悽愴
流涕數十年如一日撫再從孤弟及兄遺孤

分甘讓肥一體無間伯早亡乏嗣伯母王氏李氏
苦節三十餘年生養死葬靡不如禮額

恩建坊旌表

門力為經紀邑丞張妻袁氏以死殉夫例格不得請

為徵詩歌美之與宋女釐銀一編題曰蔚羅雙烈
集其樂成人美如此以子貴贈戶部員外郎祀

鄉賢

李振藻

蔚縣人歷官刑部郎中性孝友品行峻卓有
功名教值宣府歲災自蔚運粟數千石至宣

賑濟全活數萬至今德之子旭升官吏部
尚書贈如其官康熙四十一年祀鄉賢

李映乾

振藻李子字奇生歲貢生五歲喪母盡哀盡
禮如成人既長終身孺慕弗衰一門友愛伯

兄冢宰旭升仲兄庶常暄亨有疾籲天請代暄亨
歿哀慟過甚致疾而卒蓋其天性純至如此至其
立身行己忠信誠樸樂善
好施尤為鄉國推重云

苗發興

宣化人家貧甚路獲保安州生員宗澤儒遺
失衣物行李約十餘金訪覓付還堅不受謝

旨

酌議

雍正十二年總督李衛上其事遵
賞給銀三十兩

易州

明

李得成

涑水人幼孤母張氏明初避兵溺死得成卧水求得其尸塑父母像於中庭與妻事之惟

謹洪武十九年舉孝廉三十七年旌其門永樂中歷官陝西右布政司

謝定住

廣昌人永樂十一年定住年十二家失牛隨母尋之至村西忽虎躍出母方抱幼子定住

以牛鞭擊虎退取弟抱之扶母而行虎復追噬定住又取石奮擊虎遂去母子三人皆獲全侍郎霍方上其事帝召見親問嘉其孝勇賜鈔米并旌其門

高

鑑

廣昌人舉鄉試潛心經史深會理窟親沒廬墓三年以襟包土築墳塚高如邱後官至花

馬池布政
司叅議

張甫明

易州人父在時與叔鏞既異產三十餘年後鏞食不支貸帛以給甫明日我家自足給人

何貸他人物乎遂去墻垣盡以家資匙鏞簿籍送叔及兄掌之畧無難色鄉人異之

冀州

宋

王

翰

南宮人母失明翰自挾右目睛補之母目如故淳化中詔賜粟帛

本朝

吳仲廣

仲大

祥瑞

棗強人兄弟也順治年父為族姪毆死三子俱幼不能報

及長乃各持挺擊死殺父者爭首繫獄後皆獲釋
當三子入獄時家窶甚三子婦竭織紡以供給之
五年不懈一門
孝義遠近稱之

陳隨時

冀州人有孝行每逢令節步行赴祖塋輒泣
下無異孺子三世同居無間言歲祲有田數

十頃徧生稷禾悉招無食者自行採取全活
甚衆以子秉彝貴贈兵部郎中祀鄉賢

張

桐

棗強人家貧教授生徒所得館金悉以進父
曲意承志務得歡心父久病侍側夜卧一木

杭衣不解帶以為常及歿哀毀欲絕逢忌祭
必號慟終身不變雍正四年

旌

表祀鄉賢

賈維正

武邑人貢生好義勇為康熙間捐脩本
縣學宮製脩祭器購買古今書籍并

聖祖

仁皇帝欽定佩文齋咏物詩貯尊經閣雍正十年學使者吳應棻上其事

恩賜七品頂帶

以旌之

高文友

南宮人母病祝天願損己年以益母壽母疾以愈及母亡包土築墳廬墓三年卒年八十

有六雍正十一年

旌表

趙州

隋

李士謙

字子約趙郡平棘人幼孤事母孝其伯父瑒稱曰吾家曾子也家故富以賑施為務有兄

弟分財不均至相鬪訟士謙聞而出財補其少者令與多者相埒兄弟更相推讓卒為善士嘗出粟

數千石以貸鄉人值年穀不登悉燔契又出糧種分給貧乏農民德之撫其子孫曰此李叅軍遺惠也及卒會葬者萬餘人相與樹碑於墓

宋

曹

遵

趙州人六世同居真宗時旌表

元

劉安世

栢鄉人父才有篤疾百藥不效安世中夜潛外墅南石橋冰上冰融三寸許即以瓶取水

飲父父曰此水殊不同味與藥數日病痊人謂誠孝所感

明

程仲良

趙州人正德初歲饑良出粟七百石又勸張貴王繼各出粟五百石賑濟事聞奉詔獎諭

人以為榮良曰吾不能長活溝壑之人而濫膺天寵心實不安敢以為功哉聞者感服

蔡

慶

字天章寧晉人嘉靖進士授行人選御史剛直敢言與楊爵等同繫獄罷歸居家敦孝弟

教授生徒脩學宮置膳田三十頃以助貧生婚喪置三小學膳田舉行鄉約以教子弟捐養濟院義塚田以恤孤獨善行彰著人稱浚濱先生

本朝

魏喬慤

栢鄉人大學士喬介之弟官陝西平涼府知府性純孝年踰八十逢祖先父母忌祭雖步

履艱難必親拜嗚咽涕泗彌日辛未旱災出粟濟貧戊寅又遭冰雹捐粟千餘石全活甚衆直撫榜

其門曰當代仁人尤邃於學手一卷不釋所著有
史學彙纂名物蒙求性理字訓四書集成易經集

成極言數編等書康熙五十年祀鄉賢

趙

瓚

栢鄉人事母至孝一日晨起出汲歸見有虎

竟捨母而去乃適縣率健丁至射殺之撫院于成龍給匾獎勵曰殺虎救母

深州

北魏

崔孝政

字季讓博陵安平人光州刺史挺之子十歲父亡號哭不絕見者為之悲傷喪紀之禮特

所留情

李

几

博陵安平人七世同居共財家有一百九十口長幼濟濟風禮著聞至於作役卑幼競

集鄉里無

不歎美

馬八龍

武強人輕利重義武遂縣尹靈哲亡於軍中八龍奔起負屍而歸以家財殯葬撫其遺孤

恩如所生州郡表列詔旌其門

唐

劉君良

瀛州饒陽人四世同居門內斗粟尺帛無所私隋末荒饑妻勸異居君良斥去之曰爾破

吾家召兄弟流涕以告深州別駕楊弘業至其家凡六院共一庖子弟皆有禮節咨歎而去值鄉亂人共依之衆築為堡因號義成堡貞觀六年表異門閭

五代晉

李自倫

深州人為本州司功叅軍高祖訓訓生爍爍生則則生忠忠生自倫自倫生光厚六世同

居天福四年勅以所居飛鳧鄉為孝義鄉匡聖里為仁和里旌表門閭

宋

邢神留

深州陸澤人父作吏坐死神留年十六詣吏求代父抵罪州以聞特詔減死

明

郭弘

安平人正統七年歲歉穀貴弘首出米麥六

民

百七十石助賑賜勅獎諭勞以羊酒旌為義

耿寬

饒陽人自寬以上七世同居成化中旌表

王世泰

深州人謝姓之廝養也崇禎戊寅城破與謝氏女同被擄兵令泰與女婚不從以死協之終不從兵感其誠事得已後泰終挈女潛遁送歸謝氏州人高之

本朝

時見新

深州人事繼母至孝年荒家貧甘旨不給至鬻其子復鬻其女妻李氏亦無難色怨言州人稱之

杜盡誠

深州人性至孝傭工養親人有勸之娶者曰吾竭力以養親尚恐不給安有餘力以畜妻

子乃為弟娶婦曰弟有室母可無非曰之勞閭黨稱其孝友

六指兒

深州孝童也姓劉氏八歲而孤至十歲母患癰症卧床童晝夜扶持母憫其勞諭使暫出

旋出旋返如是兩年如一日及母歿長號不止人共憐之後依伯母居亦怡順惟謹偶語及父母輒哀泣不食以故家人皆諱而不言

張環奇

字子佩深州人登康熙甲子鄉試事父母惟謹居喪哀毀成疾不自以為病事事勉行如

禮發引時病已篤墓去城四十里猶引紼步號既窆乃歸逾月而卒鄉黨多其死孝

李如玉

深州人正定府學生父病醫藥不痊如玉焚香祝天願損己年以益父壽遂愈後父又患

左目失明虔禱神願借己一目以全父目目竟復明人以為孝感

王之俊

深州人性至孝父母歿廬墓不歸前後十六年卒年七十餘歲康熙間

旌表

張潛養

安平人性孝友訓子有家法仁心義施為一時所仰重以子倬貴贈按察司副使康熙

五十五年
祀鄉賢

張

鎮

武強人性至孝父病疫湯藥必親已亦染疾猶奉侍不倦母患癰憂思廢寢食顙天求代

母旋愈壽九十猶孺子慕至今人稱孝子遇飢歲設法拯救率以為常解囊濟困逋券悉畀火中巡撫于成龍以一門好善

題旌

建坊所著有理數家傳行世以子貴贈寧波知

府康熙三十一年祀鄉賢

張星耀

鎮之子由中書累官浙江寧波府知府事親純孝父患背疽焚香禱祝夢有神醫以甘露

洒之忠即旋愈之寧日母羅不願偕住留妻子養
馬每遣人起居遙望再拜嗚咽不勝歷七年如一
日季弟自幼失明父欲令披緇涕泣懇留完婚訓
以文義或有過輒代為受杖積俸置義田二百餘
畝量所出以給貧乏居官清正誠子曰吾以清白
貽汝也所著有行知集周易圖說等書康熙四十
四年祀

鄉賢

劉懷志

武強人性至孝十歲父歿執喪如成人立身
端嚴人有不善常畏其知爭競者每得一言

而解有徭役與邑民均之雖親丁未嘗占免一人
尤服其公正所著有尚書解康熙五十一年祀
鄉賢子謙丙辰進士官左都御史誠戊午
舉人蔚縣教諭孫自溥自潔俱壬午舉人

定州

唐

支叔才

定州人隋末荒饑夜丐食野中還進母母為賊所執告以情賊憫其孝為之解縛母病叔

才吮瘡注藥及亡廬墓有白鵲止其傍高宗時表其家

張務

曲陽人父恪試兵曹叅軍務幼聰敏博經史父喪廬墓晨夕哀號泪盡成血有羣鳥集其

廬彩雲見於上諸侯以聞詔褒之未及而卒

談英

曲陽人大中六年居祖喪廬於墓側翔禽多集彩雲忽現卒葬縣治北後人因名其地曰

孝墓鄉

明

李熙登

曲陽人舉成化癸卯鄉試父喪廬於墓側感盜送米縣令聞而異之以純孝表其閭後官

山西沁州判卒於官

王達

定州人父喪廬墓盜取其衣越日復還之曰君孝子吾不忍也弘治中旌表

本朝

郝大鈞

字聲遠定州人性孝友德器粹然終身喜愠不形於色精神所鍾惟在著書樂善所撰同

然集四卷皆經濟實學以恩貢生考授通判累贈光祿大夫康熙十一年祀鄉賢

王錄

字入穀定州人生七月而母亡事父與繼母曲承意志咸得歡心以產讓弟暨代雪冤誣

旌

表祀

諸奇節一時欽服康熙四十八年鄉賢子世祥字嘉菴辛酉舉人鄉黨比之彥方亦

祀鄉賢孫之
樞乙丑進士

宗時化

深澤人生員己年漸高恐形父母衰老棄杖作嬰兒狀以求親歡父病禱於天願以身代

父亦壽至九十餘歲父母歿馬鬣既封悲號哀鳴有羣鳥翔繞不去享壽百歲雍正十年

旌表

孫國穎

定州人家貧母老盡力奉養有祁州生員李永發販棉失驢負錢七千七百五十文昏夜

走入國穎家國穎令母守之同弟國奇遍覓永發認還却謝不受雍正十二年總督李衛上其事遵

旨酌議賞給銀二十兩

畿輔通志卷八十一

欽定四庫全書

畿輔通志卷八十二

高逸

順天府

晉

霍原

字体明燕國廣陽人少有志力年十八觀太學行禮因留習之貴遊子弟皆願一見後山

居積年門徒百數劉沉薦為司徒不就元康末與王褒等以賢良徵亦不至王浚謀僭使人問之不

答為所害

唐

盧鴻

幽州人博學善書與其弟隱嵩山元宗強之授諫議大夫不就李白詩云二盧徵不起萬

乘高其風

金

王師揚

大興人宋南渡時居崧山博涉羣書終日開戶獨坐同輩罕見其面號閉戶先生

杜時昇

霸州信安人博學知天文不肯仕進宰相數薦其才可大用乃南渡河隱居嵩洛山中以

伊洛之學教授子弟子瑛字文玉金末避地緱氏山中教授汾晉間元祖召見問計命從伐宋以疾

辭屢徵不就卒贈魏國公諡文獻

明

謝表

順天人博學洽聞不求仕進以行誼高鄉人亟稱之嘉靖中授散官不出惟開戶課子其

子從寧起家秘書郎著述博雅蔚為名流

本朝

李孔昭

薊州人性孤高前崇禎癸未成進士見時事日非不赴廷對以所給牌坊銀一百二十兩

留助軍需去隱盤山甲申都城陷白衣冠哭田間者三載

本朝訪求遺賢撫按列名以薦得
旨依用以病堅謝不出事母至孝嘗割股以愈母疾妻王

氏於薊州城陷時殉節義不再娶平居教授生徒多所成就及卒鄉人私謚安節先生

保定府

唐

張

濟字孟成唐縣人少好學隱居青巖山十餘年遠近服其仁環山不敢樵採訪使苗晉卿

表薦辟召
堅卧不起

元

陳彥

滿城人好讀書尚氣節登至元鄉舉以目昏不仕勅賜免差風勵一鄉皆勸於善

劉仲祥

號憲齋安肅人不樂仕進著書自娛與劉因友善因嘗稱其明敏博物專門理學或曰劉

祥字仲祥今城南有劉祥店云

梁玉剛

字浩然新安人好論古今談至理從劉因遊往返不厭或勸之仕曰堯舜之世尚有巢由

吾何仕乎終身肥遁自號南溪老人子泰亦有高行

劉英

字原蒙新安人早歲為吏聞劉因之學折節相從因始拒之終與之甚厚及因卒英遂一

意深隱終身不出

胡炳南

容城人以五經登元末進士第隱居自樂屢徵不就與楊九萬等講道林尖山卒配享劉

因

本朝

孫爾禎

字玉屏容城人崇禎舉人以孝節自持登科三十年絕意仕進與弟爾祚互相砥礪隱居

教授從遊甚衆

范 苯

字篤生清苑人崇禎舉人明末即不與計偕耕讀自給經年不入城市語世事則閉目論

經義則娓娓人謂有兒寬風

張翼星

字三明左衛人崇禎舉人精理學尤長於易家貧不仕隱於卜肆日獲百錢以自給衣履

常不完盛夏猶裁裁冠毳笠晏如也從弟元錫官總制屢迎不一往有所遺擇小且劣者受之其孤介如此

張羅喆

字石卿清苑人邑諸生當流賊陷保城喆手刃一賊挺身走免後以塾師終老貧無完衣

嘯歌自得太守欲餼之辭不受平生絕口不談時事學者稱石卿先生

金肖孫

完縣人邑貢生御史毓峒從子甲申毓峒殉難賊將張洪執肖孫拷毓峒子所在蕪楚炮

本

烙身無完膚終不言毓峒諸子得免入

杜

越

字君異容城人邑諸生為同郡鹿忠節公高弟與孫徵君奇逢友善互相砥礪學成行修

不求聞達毅然以開來繼往為任家貧布衣蔬食授徒自給一時名彥無遠近咸師事之

本朝康熙十七年

詔

開博學宏詞科有薦越者徵至都以疾乞歸

河間府

明

鄒野漁

東光人弘治時嘗從征劉烈有功命官不受予金不受歸而徜徉肆志與同邑廖玘善居

其家一日題壁間漁樵圖詩云士林朽木歸樵斧
宦海貪魚上釣竿須信堯夫原有意時人勿作畫
圖看後記卒恥更
依人遂窮餓以死

多嘉禎

字啟明阜城人為諸生留心經濟曉暢時務
撫按薦諸京廷對三策皆中時弊上命授以

清要力辭回籍前明二百餘年以處
士應詔者吳與弼及嘉禎二人而已

蔡笠

獻縣諸生少有逸才博文善記凡古今人物
輿圖阨塞及陰陽方技無不精考每議論風

生驚筵傾座與之言仕則不應嘗從顏山農游深
明性命之學兼長吐納導引之術年八十童顏善
飯步履如飛公卿多禮下之當時以
識不識為雅俗其見重於人如此

正定府

晉

張

晏

中山人守道不仕銳志稽古尤長於史學有所著漢書行世

張

忠

字巨和中山人隱於泰山苻堅徵之辭還至華山而卒謚曰安道先生

順德府

漢

孟

敏

字叔達鉅鹿人隱居不仕嘗客居太原荷甌墮地弗顧而去郭泰見而問之敏曰甌已破

矣顧之何益泰奇之因勸令學卒以成德三公徵辟不就

三國魏

張

致

鉅鹿人徵辟不應遠遁恒山明帝時張掖郡有寶石負圖太史令奏以為禎或以問瑒瑒

曰神以知來不追已往此當今之變異將來之禎祥也遂隱居不與時競以道自樂年百有五歲而

卒

唐

李元愷

邢州人博學善天文歷數宗璟嘗師之既當國將薦之朝拒不答卒年八十餘

廣平府

元

趙慶祥

永年博學多識邃於名理隱居不仕教授於潭湘之間學者多宗之

本朝

張

蓋

字覆輿永年人為諸生性孤介家貧績學崇禎時以次當貢太學不就母老饋粥不繼授

徒以養甲申後自閉土室中七年穴而進食歲時一出拜母雖妻子不見也年六十卒

大名府

隋

張清豐

頓邱人開皇中以孝廉徵聘不就遠近皆想望之至唐大歷中以其名名縣云

元

張

淳

字子素南樂人志趣高遠學識宏博以著述為業至元中徵辟不就有四書拾遺及文集

行世

明

秦裕伯

大名人元進士棄官寓揚州張士誠招之不
出洪武元年上命徵之對使者曰受元爵祿

三十餘年背之不忠也母喪未終忘哀而出不孝
也固辭後上復手詔諭之命為待制固辭不就

本朝

劉永錫

字欽爾魏縣人崇禎舉人授長洲學教諭甲
申後隱於陽澄湖巡撫欲薦用之以疾固辭

家貧衣食或不給澹如也嘗自鼓枻出至中流
作歌歌竟而返以病卒其友及門人共葬之

夏道一

字元真大名人士崇禎舉人性高潔兩上春官
不第輒隱居自放甲申後絕意仕進率子耕

田柿迹不入城市食指不給每操斧斤匠作紡車
自鬻或携婦績線易薪米市人利其精細爭購之
不言值得錢入懷袖短衣行歌家居自為詩文寫
紙片寸許有窺之者即投水火諸子皆不令讀書
鞭牛負薪而已

宣化府

晉

公孫鳳

字子鸞上谷人少有經學隱於昌黎之九成
山谷彈琴吟咏陶然自得慕容暉在鄴以安

車徵之及見不言不拜衣食舉動如在九成賓客
造請鮮得與接年九十餘卒所著有易通及五行

會說謚曰
貞德先生

趙州

北魏

李

謚

字永和趙郡平棘人相州刺史安世之子少好學以公子徵拜著作郎辭以授弟郁州再

舉秀才公府二辟不就惟以琴書為業著明堂制度論卒年三十二博士孔璠等上書詔曰謚屢辭徵辟志守冲素儒隱之操深可嘉尚謚曰貞靜處士

睦

夸

高邑人耽好書傳高尚不仕少與崔浩為莫逆交浩為司徒奏徵為中郎辭疾不赴州郡

逼遣不得已入京與浩相見經留數日惟談叙平生不及勢利浩每欲屈之竟不能發言

深州

漢

崔

毅 安平人博學能文父篆不仕王莽臨終作賦
自悼毅傷父志不伸託疾隱身以典籍為業

後子駟亦不仕
蓋家教云

隋

崔

廓

字士元安平人博覽羣籍多有通涉山東學
者多宗之不應辟命與李士謙齊名時稱崔

李

易州

東漢

周

黨

字伯況廣昌人家散千金飭身修志里稱其

高王莽

竊位託疾杜門

後賊殘滅州郡不入

廣昌建武中徵為議郎以病去職隱居
黽池屢徵不起帝手詔賜帛褒之

畿輔通志卷八十二

欽定四庫全書

畿輔通志卷八十三

藝術

順天府

南北朝魏

劉靈助

燕郡人善卜筮隨爾朱榮入洛所言輒中莊帝親信之及榮死靈助乃還鄉里舉兵為爾

朱兆所害明年齊神武滅兆贈幽州刺史

元



李

衍 省平章政事卒謚文簡衍善竹石窠木所著

竹譜今傳於世子行官至黃巖
知州竹石得家學尤善山水

藝

元 寶坻人始為黃冠師事青州把道錄傳其藝
至元中凡兩都名刹範佛像出元手者神鬼

妙合天下稱之其上都三皇尤古粹仁宗嘗勅元
非有旨不許為人造後大都南城作東嶽廟元為
作仁聖帝像其侍臣像久之未措手適閱秘書圖
畫見唐魏徵雙然曰得之矣非若此莫稱為相臣
於是遽走廟中即日成像其所為西番佛像多秘
人罕得見者元官為昭文館學士以壽終

永平府

明

趙

楷

樂亭人邑諸生少聰敏得麻衣訣然不欲以術售撫寧翟中丞鵬林居楷望見輒語人曰

翟當起重用第不終耳亡何起至大司馬總督六鎮遭阮王司徒好問不偶意鬱然楷曰君當清貴可上卿無憂不第後果然又能自知休咎俱言如左券

保定府

南北朝梁

許

澄

新城人澄父爽初仕梁為中軍長史隨柳中禮入長安與姚僧坦齊名拜上儀同三司澄

有學識傳父業尤盡其妙歷位尚藥典御諫議大夫封賀川縣伯父子俱以藝術名

北齊

許遵

新城人明易善筮兼精天文風角占相其驗若神齊神武中引為館客自言祿命不富貴

不橫死是以任性疎誕多所犯忤神武常優容之芒陰之役遵謂李業興曰賊為水陣我為火陣水勝火我必敗果如其言子暉亦學術數遵謂曰汝聰明不及我不勞多學惟授以婦人產法豫言男

女及產日無不中以此數獲賞賚焉

隋

許智藏

高陽人祖道如常以母疾遂博覽醫書究極其理時號名醫語諸子曰為人子者當膳視

藥不知方術豈謂孝乎由是世相傳授智藏事隋文帝為員外散騎侍郎秦王俊有疾召之俊夜夢其亡妃崔氏泣曰本來相迎聞許智藏將至當必相苦為之奈何明夜俊又夢崔氏曰妾得計矣當

入靈府中避之及智藏至為俊診脉曰疾已入心當發癰不可救也俊果數日而薨

元

田景延

清苑人自幼有巧思畫山水人物為獸下筆逼真人得一幀即為異珍而藏之尤工寫真

風神氣韻得於意外容城劉靜修嘗題曰烟影天機減沒邉誰從毫末出清妍畫家同有清談癖到處南華一嗒然

明

趙律

雄縣人性至孝因母疾乃學醫術洞究軒岐之秘以濟人為心畧不責報尤精太素脈易

州守某誥誤失官屬胥其脉律曰來春可辨明後如其言得白除上蔡令過雄復請診之律驚惶不

敢對陰謂其子曰此分體脉也凶莫甚焉後果遭流賊之變夫婦俱死節

本朝

呂

申

原名牙興字文甫清苑人申才姿穎敏少即淹博弱冠食餽屢試不售遂博求天官輿地

及奇壬太乙孤虛風角諸書卜筮推詳什不失一談休咎質與不易解久之乃驗從遊甚衆遠近呼為呂先生或曰呂仙

河間府

周

扁

鵲鄭人姓秦氏名越人少時為人舍長舍客長鵲君過扁鵲謹遇之長秦君知為非常人出

南北朝魏

八十餘年乃出其懷中藥予扁鵲曰飲以上池之水三十日當知物矣乃悉取其禁方書盡與之扁鵲依其言飲藥三十日視見垣一方人以此視病盡見五臟癥結特以診脉為名耳由是名聞天下

信都芳

字王琳河間人少明算術兼有巧思嘗云算

歷之妙機巧精微我每一沉思不聞雷霆之聲嘗集五經算事為五經宗及古今樂事為樂書又聚渾天欹器地動銅鳥漏刻候風巧事并圖畫為準為器

隋

張胄元

渤海蓆人善術數推步甚精密高祖時令參議律歷事官太史令

盧太翼

河間人本姓章仇氏七歲日誦數千言州里號曰神童及長博綜羣書尤善占候文帝將

避暑仁壽宮太翼固諫帝怒將斬之及疾將崩命太子釋之煬帝即位賜姓盧氏其所言天文事應驗者不可勝數

遼

劉完素

河間人字守真早遇陳希夷服仙藥而醉及寤洞達醫術療人多有異驗著原病式一卷

宣明論
五卷

天津府

南北朝北齊

吳遵世

渤海人少以易筮知名魏孝武時有所筮無不應文襄即位除中書舍人所著有易林雜

占百
餘卷

唐

李清

北海人隋開皇四年入雲門山窟遇仙授書一軸甫旬歸已為唐永徽元年矣開所授書

乃小兒醫方屢試屢驗後入太行不見

邢和璞

不知何許人隱於瀛海間善算術凡人心之所許布算而知之卜居嵩穎間著穎陽書三

篇有算心旋空之訣

正定府

元

李杲

字明之鎮州人從張元素學醫盡得其術家

富厚性高蹇人不敢以醫名之所著有東垣
十書傳世元史方技傳
載其所治症驗甚詳

明

毛伯時

號蘭竹先生元氏人幼失明能誦易精潛虛
學預談人吉凶壽夭貧賤富貴無不應者被

遇太宗嘗以袞天罡稱之寵眷優渥入之以老乞
骸骨勅中使護送還里以疾卒孫玉正統進士詳

文翰
傳

順德府

北齊

魏寧

鉅鹿人武成時以善推祿命徵為館客所言多奇中詳北史藝術傳

明

劉于台

唐山人少聰穎業儒術萬歷中補弟子員志氣恢巖而工於畫凡山水花草人物備極其

巧人多寶之時名公有云易庵文肖巖字于台畫可稱唐山三絕

廣平府

晉

黃泓

字時長斥邱人父沈善天大秘術泓從父受業尤明禮易永嘉之亂以識言率宗族歸慕

容廐廐待以容禮引為參軍軍國之務動輒訪之
泓說成敗事皆如言廐常曰黃參軍孤之仲翔也

南北朝梁

張

暄

清河人以星歷奉朝請天監中受詔集天文
錄三十卷孫子信學藝博通尤精歷數後魏

末避葛榮亂隱於海島中積三十年專以渾儀測
候日月五星差變之數後張胄玄劉焯等本其差
度為定入交食分及五星定見定
行與天密會皆古人所未得也

金

李慶嗣

洺州人少舉進士不第棄而學醫讀素問諸
書洞曉其義天德間歲大疫慶嗣和藥於米

分遺貧民全活者甚衆年八十無疾而終
所著有傷寒纂要及傷寒論針經等書

元

趙世英

字唐臣永年人父慶祥以星歷名家英學尤出父右嘗以自黃帝堯舜三代而後泰火餘

遺文殘缺漢興師法多門唯太初四分皇極太衍欽天為最密然數一而所祖各別深心研考經史子集靡不精究其極鄉黨無少長咸服之年七十六卒

明

趙得秀

肥鄉木工多巧思人呼為魯般南遊武夷得異人傳修真秘訣歸至林慮愛其山水陡絕

練藤葛為繩橫以木攬輓轡拾級而升置三清等殿精巧如法人跡罕到遂遁跡頤養其中徵造州南石橋百丈一甃而無斧鑿痕又於西崖絕渡處懸木以通鑿石函將死語其徒曰幸葬我函中及

死如言葬之甫出數步而懸石下人皆稱為魯般壑

易州

五代南唐

奚鼎

易州人與弟鼐子超輩製墨極精後超與其子庭珪自易渡江遷居歙州南唐賜姓李氏

金

張元素

字潔古易州人八歲試童子舉二十七試經義進士犯廟諱下第乃去學醫無所知名夜

夢有人以大斧長鑿鑿心開竅納書數卷於其中自是洞徹其術河間劉完素病傷寒八日不食元素診脉愈之完素大服元素自此顯名元素治病不用古方其說曰運氣不齊古今異軌古方新病

不相
能也

冀州

遼

王

白

冀州人明天文善筮卜仕晉為司天少監遼太宗入汴得之凡決禍福無不中保寧中歷

彰武興國二軍節度使撰百中歌行於世

趙州

南北朝魏

耿

元

字并所貴持及來問之意其所卜筮十中八

九性耿介王公有求筮者
拒而不許官至鉅鹿太守

宋

馬

韶

平棘人習天文開寶中太宗以晉王尹京申
嚴私習天文之禁韶素與太宗親吏程德元

善每戒韶不令及門九年冬十月十九日既夕韶
忽造德元德元恐甚詰其所以來曰明旦乃晉王
利見之辰韶故以相告德元惶駭止韶一室遽入
白太宗命德元以人防守之將聞于太祖及詰旦
太宗入謁果受遺踐阼韶以赦獲免踰
月起家為司天監主簿終太常博士

畿輔通志卷八十三

欽定四庫全書

畿輔通志卷八十四

流寓

順天府

三國漢

關

侯河東解人好義武勇喜讀左氏春秋少寓涿郡與昭烈張飛誼同兄弟及定已蜀拜前將

軍名震
華夏

宋

吳

激

建州人工詩能文字畫俊逸得婦翁米芾筆後使於金以知名被留著山東集

張

邵

烏江人金送邵於劉豫邵見豫責以君臣大義詞氣俱厲豫怒械置於獄豫知邵不屈復

送於金拘之燕山僧舍從此皆莫知所之

林冲之

莆田人宋元符進士靖康初金人侵汴冲之以主客郎中副中書侍郎陳過庭使金同被

拘徙奉聖州越二年過庭卒金人逼冲之仕劉豫不屈徙置顯州極北沍寒之地

金

史

肅

字舜元京兆人僑居北京高才博學善詩賦為監察御史後貶同知汾州

元

趙

復

德安人姚樞奉命蒐訪人才見復與語大悅與之北上楊惟中請建太極書院延復為師

復乃錄其所記程朱之書以教學者由是河朔始知道學復竟不受官

明

黃潤玉

字孟清世為鄞人僑寓都城北永樂中舉京兆試授訓導累遷交趾道監察御史生平著

述甚富以朱子嘗欲編禮記附儀禮乃取儀禮析為四卷以禮記比類附之不類者附諸卷首末各有意義取周官大田禮補為軍禮仍註之撰書經補註學庸通旨深衣古制攷寧波志等書行世

陳以見

字汝誠福建福清人貢入太學中順天鄉試與大城蔡如葛李學書為同年友遂假館邑

中教授生徒為人沉毅簡重不妄言笑至談經史則疊疊不倦多所發明古文辭力追秦漢有狄今

至縣一見即器重之率庠生傅化龍等三十餘輩以弟子禮執經請業焉狄每公餘詣會所談論至夜分甚喜諸生得所宗也後任同安教諭

徐

玉字汝和少遊涿州嘉靖時武進士任居庸把總時大同軍叛上命撫之玉至單騎入城諭

以大義衆咸服轉副總兵庚戌敵犯京師奮勇鬪擊捷聞上撤御前饌以賜之實授都督僉事守大同以忤嚴嵩左遷保定鎮守是時敵薄浮圖峪玉拒戰八晝夜敵敗去南倭蹂躪福浙玉率子姪為先鋒夜抵倭巢三獲大勝陞南京中府僉書後以過直被論值南京兵亂玉驅家丁戰於城中擒首惡數十人梟首示衆事平復舊職轉北京後府僉書以老乞歸

湯文瓊

字兆鰲石埭人崇禎中授徒京師數獻策闕下不報京師陷書其衣衿曰位非文丞相之

位心存文丞相之心投繯而死福王時贈內閣中書

永平府

晉

趙

至代郡人遠適遼西幽州三辟部從事斷九獄以精審稱

明

劉

宣

字紹和安福人代父戍盧龍雖在行伍勵志讀書巡撫鄒來學閱其文大驚待以殊禮送

之試京闈舉酒祝曰汝此行必取解首否則無相見衆竊笑之是秋果中第一仕至南工部尚書宣少罹窮苦故歷官自奉涼薄食不重味一衣二十年為能儉以成廉云

魯紹芳

餘姚人性恬澹積學有蘊藉萬歷初因祖成山海依焉乃設教闢門以戴禮訓諸庠士榆

之治禮者

多出其門

王元輔

字玉鉉揚州興化人隨父宦永平遂家焉元輔姿性過人補郡弟子員家貧授徒養親曲

盡誠孝郡人韓令尹應奎妻以女元輔不愛美飾韓女即練衣躬行儉素夫妻相敬如賓有鮑宣桓

少君之風庚午歿於兵

保定府

晉

葛

洪

字稚川丹陽句容人好仙晉咸寧初以句漏出丹砂求為令曾隱於唐縣楊家峪

隋

韓擒虎

字子通河南東垣人也後家新安父雄以武烈知名擒虎少慷慨以膽畧見稱以軍功拜

都督新安太守文帝欲併江南以為廬州總管與賀若弼共經畧之尋用為先鋒平金陵執陳主叔寶至京與若弼爭功上前上曰

二將俱合上勲進位上柱國

唐

張

說

字道濟洛陽人唐開元中中書令過滿城築書院於抱陽山以為歲修之所後人名其居

曰相公堂
遺址見存

明

秦鳴雷

湖廣人嘉靖中來至定興北郭神祠中所交無貴賤接以誠能先識其意偶代為慶弔語

辭翰精工餉物率不納市行見大棗則率意取啖人顧樂其取也張中丞鎬極重之隆冬贈大皮蓐却之改贈絮袍乃受乃出見寒者則解贈矣寒暑止曳一鹿皮數年卒浮葬廟壙其子賢書後求得之面如生爪甲長數寸

湛若水

號甘泉廣東增城人弘治乙丑進士授翰林編修倡明陽明先生良知之學四方學者多

從之游正德中寓安州觀光書院講道論學士子多侍講席受業題其扁曰正學書院

河間府

漢

趙

岐

桓帝時為皮氏長閒有家禍因從官舍逃走之河間變姓字又轉詣北海著絮巾布袴常

於市中販胡餅孫賓碩時年二十餘乘犢車將騎入市見岐疑其非常人因問之岐乃具告之賓碩遂載岐驅歸駢車門外先入白母言今日出得死友在外當來入拜乃出延岐入椎牛飲酒快相娛樂三日因載往別田舍藏置複壁中後數歲唐衛及弟皆死岐乃得出還本郡三府竝辟累官至郡守刺史太僕卿而賓碩亦從此顯名於東國仕至豫州刺史

宋

王

倫

華縣人金遷之河間居六年金欲以為都轉運使倫曰奉命而來非降也金益脇以威倫

拒愈力金縊殺之聞者咸為哀悼

家鉉翁

眉州人累官端明殿學士僉樞密院事宋亡旦夕哭哀者數月元以其節高欲尊官之以

示南服鉉翁義不二君辭無詭對改館河間乃以春秋教授弟子元成宗即位放還賜號處士賜賚

金帛皆

辭不受

明

程信

字彥實其先徽州人後隸籍河間衛正統時授吏科給事中英宗北征偕廷臣上疏諫止

不報已而師潰土木敵南侵進薄都城都督孫鐘槃之失利欲入城信堅不可躬督軍以火鎗礮石

鼓譟為鉉聲援敵乃引去貴州蠻酋都掌反命信督軍討之賊悉平河套歲多警輔臣請

與師十萬搜剿之信以為師衆地遠不可副將楊信請以三萬人往信曰此舉關係國勢

若三萬人戰則少守則多衆服其言卒與二萬人
巡邊未幾承命參贊南京機務因星變陳言多見
施行四載復上疏乞休明年還休
寧越四年卒贈太子少保謚襄毅

天津府

元

海上老人

隱姓氏住渤海條山洞中時與山左
右耆老相遊息遇金亂年荒饑死者

衆諸老憂切不釋老人曰從吾入海以度
年儉入海煮石而食甚甘美次年諸老皆

肥澤
而歸

明

卓敬

浙江人徙滄州洪武戊辰進士歷任刑部尚書洪武中諫諸王踰制又疏

上建文言燕王智勇絕人北平強幹之地宜徙南昌以絕禍萌後永樂徵大用敬不

從被誅
滅三族

左懋第

號蘊石山東萊陽人南皮令左之禎姪也嘗隨叔任居此及登第服官往返數過每

至必與故遊暢飲盤桓不忍別後以奉使死

正定府

金

元好問

字裕之秀容人學者稱為遺山先生金亡不仕後卒於獲鹿縣

元

硯彌堅

應城人元初大將狗濮上招致而北因家正定以教授為業已而被薦擢為正定教授至

元中初置國子監召拜國子司業屢以忠孝之道訓迪諸生由是化服者衆歲餘以疾辭歸堅學問淳正文章質實為人清苦嚴重士論推之

安

滔

太原離石人世為儒家九歲以經童登第習詞賦舉業貞佑初河朔震動金主南徙都汴

獨山西諸州恃險不降丁丑元師至滔避兵召洞軍士以火逼之舉族皆死滔僅得出為所執將殺之有監軍石抹陳奴馳使呼之至易以敝衣詭其鄉里獲免滔遂委身從之至藁城陳奴與之田宅戊戌設科取士滔以詞賦中選遂占籍藁城子孫俱以仕顯稱巨族云

李

椿

淮陽人元初兵亂北走河朔遂徙居藁城性質直好禮課子孫力農讀書居西管鎮垂四

十年足未嘗輕履城市既老家雄資財好施與鄉之貧乏多賴之年幾九十無疾而終

順德府

周

豫

讓

晉人趙襄子滅智伯讓逃遁山中變姓名漆身為厲吞炭為啞行乞於市欲為智伯報仇

屢刺襄子不中襄子義之乃使使持衣與讓讓拔劍三躍呼天而擊之曰吾可以下報智伯矣遂伏

死

廣平府

周

魯仲連

齊人奇偉倨傲持高節不仕趙孝成時魏使新垣衍問入邯鄲說趙王尊秦王為帝時仲

連適遊趙乃見平原君謂行曰秦者棄禮義上首功之國即肆然為帝連有蹈東海而死耳衍起拜謝乃不敢復言帝秦秦將聞之為却軍五十里於是平原君欲封仲連辭不受繼而置酒以千金為壽復却之遂辭去終身不復見

公孫龍

魏人龍在趙聞虞卿欲以信陵君之存邯鄲為平原君請封夜駕見平原君曰此甚不可

舉君相趙者以君為親戚故也今信陵君存邯鄲而請封是親戚受城也此甚不可且虞卿操其兩權事成操右券以責事不成以虛名德君君必勿聽也平原君遂不聽虞卿厚待公孫龍龍善為堅

白之辨及鄒衍過
趙言至道龍乃絀

漢

陳

逸

汝南平輿人父蕃死獄中蕃友朱震匿逸於甘陵界中大赦乃還

南北朝魏

范

晷

字彥良順陽人遊學清河遂徙家僑居郡能加徵為五官掾歷涼州刺史轉雍州俱有政能

左將軍二子廣雅廣字仲將
舉孝廉除靈壽令不之官

大名府

唐

王義方

泗州人客於魏孤且窶事母謹慎淹究經術性謇高自標樹由明經官至侍御史不旬日

會劾李義府貶萊州司戶叅軍歲終不復往調客昌樂聚徒教授母喪隱居不出卒門人相與行喪

時松柏塚側

三年乃去

宋

尹崇珂

泰州天水人後徙居大名崇珂初事周世宗於藩邸以謹厚稱及即位從戰高平有勞績

遷本班副檢點從征淮南遷都虞候宗初出為淄州刺史有善政民詣闕請刻石頌德太祖命殿中侍御史李穆撰文賜之南漢開府樂範等據五州之地以叛崇討之數日盡平其黨卒年四十二贈

侍中

閻守恭

并州榆次人劉氏平徙太原民實大名守恭在徙中往來并汾間應募隸拱聖軍擢殿前

押班咸平中從韋河北以功為捧日副指揮使歷乾州刺史明道中落軍職以德州刺史為永興軍兵馬鈴轄徙并代路守恭性沉勇御軍嚴肅所得俸悉散親族在并州因春社會賓客曰守恭太原一貧民爾徒步位刺史老復官鄉里踰分多矣今日與卿輩決後十日卒

宣化府

遼

耶律淵

本臨橫長壽人任奉聖州礬山監勸課耕稼勞來有方在軍十有五年與士卒同甘苦未

嘗妄筭一人比休致親沒即於縣西求善地以葬因家礬山哭必盡哀祭必盡敬子弟皆服素以待

無敢一有慢容
礬山人皆化之

明

沈

鍊

字青霞浙江會稽人嘉靖間任錦衣衛經歷
俺荅薄都城鍊上疏請以萬騎護寢陵萬騎

護通州軍儲而合勤王師邀擊其情歸必大捷是
時嚴嵩用事寢格不以上聞鍊乃抗疏言嵩受國
重任不聞治國安邊惟與子世蕃為全家保妻子
計因歷數其十大罪請戮之以謝天下詔以鍊詆
誣大臣廷杖謫保安子身至里長老問知鍊狀咸
大喜遣子弟從學鍊與語忠義大節乃爭詈嵩以
快鍊鍊亦大喜日相與詈嵩父子以為常嘗束芻
為偶人三日為林甫檜及嵩而射之語稍稍聞嵩
父子銜之囑其黨總督楊順巡按御史路楷謀殺
鍊捕諸白蓮教通叛者竄鍊名籍中以聞竟殺之

順猶慮未快，嵩意并杖殺其二子。後順措敗，長子襄白父冤，追贈光祿少卿，建祠保安歲時，致祭。

三國

應

邵

汝南頓人，初為太山太守，避曹操難，來冀州，依袁紹，常刪定律令，為漢義秦之著述甚多。

陳

琳

廣陵人，與王粲等友善，避難冀州，袁紹使典文章，令作檄數曹操罪，後紹敗歸曹，操曰：

卿為紹作書，但可罪孤而已，何乃上及祖父琳謝罪曰：矢在絃上，不得不發，操愛其才，不之罪。

趙州

南北朝魏

王憲

符秦相猛之孫，父永鎮幽州，從符丕戰沒，襄陵憲流寓高邑，魏道武自中山南巡至高邑。

得憲喜曰王景畧之孫也以爲
本州中正領選曹事兼掌門下

畿輔通志卷八十四

欽定四庫全書

畿輔通志卷八十五

仙釋

順天府

周

甘

需

燕昭王時有仙人甘需為之臣王行其道數月有仙子來告曰西王母將降後一年王母

果至甘

需尋去

晉

惠

能

其即盧行者范陽人聞五祖在黃梅乃從之為其役使五祖欲令寺僧作偈上座神秀曰身

是菩提樹心如明鏡臺時時勤拂拭莫遣有塵埃能方在碓舂米亦書一偈曰菩提本無樹明鏡亦非臺本來無一物何處惹塵埃五祖見之潛付衣鉢後為六祖賜號大鑒禪師

南北朝魏

寇謙之

昌平人少遇仙人成功興與之遊嵩華食仙藥遂隱嵩陽元魏始光中召至闕謙之一日

謂弟子曰昨夢功興召我於中嶽仙宮遂羽化有青氣如烟從口中出其體漸縮識者謂尸解後東郡沈猷見謙之在嵩山身作銀色光明如日

唐

靜琬

姓氏里居不可考訪求名勝至燕涿鹿山之北白帶山見峰巒靈秀遂採石造十二部石

經自隋大業迄唐貞觀大涅槃經成是夜山吼生香樹三十餘本六月水漲忽浮大木于統至山下

因構雲居寺明皇第八妹金仙公主增修之今香樹林後琬公塔存焉

薛

昌

幽薊人為進士唐天寶間棲止於蜀之青城洞天觀忽得商陸酒飲之耳鼻血流死經三

日屢然而蘇身輕目明勢欲飛舉洞見遠近節度使延置客館欲送至京師忽失所在

遼

常

在

遼重熙間在寶坻縣城南隅渠水之陰建彌陀佛舍結廬其傍持經侍佛棲心入道澹然

而居其中後趺坐而化茶毘之日火身不灰徒僧以其身立於佛側已而髮再生馬踰月則削之後

有女子以手捫其頂髮遂不生

金

梅志仙

檀州人戒行嚴峻修道黑山二十餘年遂能出神遠遊郡國人莫能測有無根柏一株使

其徒裁之即見茂盛卧於石崑決辰不食虎馴擾其側年九十餘端坐而化

邱處機

登州人九歲從重陽祖師遊金世宗召問以持盈守成之難為對居萬寧宮後還終南元

太祖請至作醺焚簡飛空五鶴翔舞每有咨訪以清淨慈孝為對請住太極宮賜以虎符凡道家事

一委處置卒年八十餘封長春演道教主真人

曇無竭

姓李氏幽州人幼為沙彌修苦行後入流沙進至罽賓禮佛鉢學梵書梵語求得觀世音

受記經梵文尋西八月氏國天竺界惟賣石蜜為糧隨舶泛海達度州而歸後不知所終

洪源

順義人幼夢釋迦佛自天而降坐中堂授法華經源敬仰久之而覺遂辭父母居西峰寺

後掛錫靈岩院一日出遊卧沙灘側有虎繞其身見者異之

元

劉鉉英

號海蟾子燕地廣陽人以明經擢第素喜性命之學一日道士來謁海蟾待以賓禮問姓

名不對自稱正陽子海蟾師事之道士授以丹訣海蟾遂從遊秦陶真子泰華終南之間韜光隱曜人莫能測後隱代州之鳳凰山遊歷名山所至多有遺跡丹成尸解有白氣自頂出化為鶴飛而冲天元至元六年詔贈明悟弘道真君

岳真人

涿州人其母一日夢老人皓髮長身冠劍莊偉告之曰我今當寄母家矣明日州人見有

青氣西北起自天而下奔往視之止於岳家真人乃生自幼不食酒肉長即辭親學道師事太元真人學得其秘元至元中封崇元廣化真人丞相安主病真人視之即愈大德初仙去

明

癡呆子

姓陳福建人永樂中至房山隆陽宮修真後入武夷山遇至人授金丹秘訣居恒如醉年

八旬貌若嬰兒常懸鐵牌於胸驅役雷霆人稱之曰鐵牌陳

尹山人

燕人元始祖時為天慶觀道士懷一牒綴之羊皮久而常存成化間遊南都髮累歲不櫛

人呼為尹蓬頭每卧輒踰月少五六日起居常不飯人饋之食亦不辭南京有宦者遣僕上病疏晨

遇尹於端門告以疏已得旨午餐尹報宦曰今旦
端門前見使者君已得告後僕還數問果合人聞
而異之魏國公館尹於第嘗晝睡寤而語魏國曰
適遊姑蘓洞庭山魏公愕不信即出袖中兩橘昇
之其時南京尚未有洞庭橘也王文成公守仁試
禮闈落第卒業南雍從尹遊尹曰爾大聰明第筋
骨脆難學我爾無長生分其竟以勲業顯哉文成
悵然後劉瑾潛圖不軌恐尹知之羅而戍之闕右
至戍所偶過鐵鶴
觀騎一鶴凌空去

僧德寶

別號笑巖京師人錦衣世家吳氏子也生於
正德壬申年二十二披剃於都門之廣慧寺

師事了空偏叅名山得
紹臨濟二十八世衣鉢

王曰銓

開州人生而記憶兩世事博通經史尤精於
春秋後棄舉子業悉心內典大有覺悟時或

口占自述如蘆花兩岸雪江水一天秋鐵牛耕破
扶桑國迸出金烏照海門人皆傳頌之號鮒鰓山
人又號蓮舟居士萬歷十七年對人言明春當化
去果應之所著有心經註疏金剛經註疏行世

善岩

開州人姓宗氏少習舉業不就遂厭棄塵囂
落髮州之雲峰寺能詩與縉紳相唱和徧遊

終南五臺武當諸勝還魏掛錫郡城普照寺建白
雲窩繙閱經藏不窺庭宇定息十餘年一日示偈
曰樹倒藤枯是去年了然無法與人傳雲收雨霽
山嵐靜高古長空一月圓遂坐化有翠峰詩集行
世

永平府

晉

陽翁伯

盧龍人性至孝父母終葬於無終山山高八十里上無水翁伯廬墓側晝夜號泣忽泉出

於側有神人遺以白石令種之生白壁長二尺者數雙北平徐氏有女翁伯求之要以白壁一雙翁

伯乃以五雙聘之數年夫婦俱仙去

帛仲理

海州人隱無終山合神丹嘗作金五千觔以救百姓今山有丹竈遺址

明

陽不語

樂西人幼為僧明初棲祥雲島古剎嘗寂坐竟日初不多口人因呼為陽不語後往往見

有二虎來卧寺門不語汲水飲之

馬真一

河南人一百八十餘歲昔在華山學道崇禎初入廣寧居北鎮廟採蔘姑拾野菜為食尋

居山海所談休咎皆應詠諧之中每或識兆後不知所之

祥邁

別號如意野老住持昌黎道者山嘗著蓮華經序成佛前祝曰某愚昧不能闡發大道如

文可傳碎而復合乃剪撒之須臾微風鼓湊如故一字不亂衆異之遂刊傳

本朝

性在

居遷安縣景忠山知止洞順治十年

世祖章皇帝手札召入萬善殿未幾乞還山賜號慧善普應禪師康熙十六年

聖祖東巡駐蹕山寺御題其洞曰苦行

保定府

宋

羅喬

宋慶歷年間喬曾遊恒嶽題詩云白驪代步若奔雲間人所至留詩跡欲知名姓問源流

請看彬陽山下石後聞鄉人言昔有真人得道乘白驪行石壁上喬從之學道年八十益壯與羅道成隱於唐縣山中後人呼其山曰羅喬山

金

田志亨

蠡吾人號通真子父母亡負土築墓一日捨妻子為黃冠師卜居唐縣之磨巖坐柏樹下

一磨石日丐食村落幕宿石上每有猛獸巨蛇直前皆俛首而退里人異之為創觀居焉壽八十終

劉道秀

安肅人少往磐谿山禮和光道人為師後省家見莊客暴死興之符立活又劉氏妻暴死

治之立愈嘗有羣盜夜劫道秀遽呼
大風吹起盜皆潰去其靈異多類此

元

蔡真人

滿城人母王氏感夢而生六歲始能言七歲
出家戒行嚴甚金大安初聞邱真人即恭詣

之口授其訣遂得悟焉元帥張柔領軍治滿城以
狀奏之賜真人湛然江月之號丁酉歲五十九告
弟子曰苦塵俗殆將歸矣翌日具衣冠端然而逝
不雲而雪樹木皆掛比葬有鶴翔翔人以為仙去
有江月集
行於世

董志平

字道衡完縣人家世農業年十九求邱真人
教以全真秘語鐵冠隨身雲蹤鶴跡賜號通

真一日疾不食不言惟出手番一覆二指空喻十
五日上昇也至日薰沐跣趺而坐出頌示人曰惟

似團圓月光華照影清自從雲歛後何處不分
明頌畢而逝度衆三百五十餘徒年七十九歲

張道寬

安州人壯嬰危疾一夜夢神人授以符咒且
語之曰北去結緣呼奴山既寤疾皆愈遂訪

至順州得呼奴山館馬號白雲無何疫癘大作寬
依法咒果實令病者食之立愈遠近謁者日千百
計東平王苦瘍勅召寬至頓痊勞以殊典卒葬於
館西壁下至今居民疾病禱多靈應呼為聖師
范至果

滿城人號悟真子元丙申歲修行葛洪山漆
峪中採薇而食年九十一日沐浴更衣謂衆

曰今日酉初刻吾必去
矣至期儼然端坐而卒

明

唐縣老姑

不知何許人無姓氏隱於唐縣山中自云
貧道住世二百年矣言訖投崖不墮飛昇

而
去

郝仙姑

安州人幼時癡憨若無知者蓬頭跣足父母早亡兄嫂惡之嘗有一丐者病顛垢污藍縷

人不敢近直造女所索水飲女敬與之兄嫂見之怒女猶禮待之與藥數粒女吞之有雲起乘而去

莫知所終今廟祀祭頭村

楊

燧

保定左衛人少得異術祈雨遣將無不徵驗以正月十六夜邀同妻弟某觀燈揚州使閉

目凌空須臾而至一時閤傳其異有司將以妖術捕之燧聞即瞑目而逝遺骸臭穢其妻具棺葬之後人復有遇之者歸告其家發塚視之空棺而已

河間府

漢

元俗

居河間數百年餌已豆雲母亦賣之都市七

餘頭問其故曰此六世餘殃所致非王所招也王
家老舍人言父世已見俗俗日中無影驗之果然
王欲妻之女夜亡去
後人常見於恒山下

三國

郝

姑

字女君本太原人徙居莫縣魏青龍間與鄰
女十人於溫漢洩水邊挑蔬忽有三青衣童

子至女君前云東海公娶女君為婦言訖敷茵褥
於水上行坐往來有如陸地其青衣童子便在侍
側沿流而下鄰女走告之家人往看莫能得也女
君遙語幸得為水仙願勿憂怖仍云每至四月送

刀魚為信至今四月多刀魚鄉人每到四月祈禱州縣長吏入女君祠先拜然後得入

唐

俞靈瓚

河間人入衡山九真觀修道十餘年南岳赤君授以回風術行之二十年能坐見天下事

如在掌中然自晦不為異以驚俗唐元和中郴州官吏見其談說始驚之即曰我偶然耳非有知也

遂入九疑山絕粒

天津府

漢

鮑 靚

渤海人明天文河洛數舉南陽太守入海遇風波饑甚取白石煮食活百餘歲後不知所

之

唐

石

垣

渤海人游趙魏諸名山遇異人得道能分身同時詣十餘家已而各家皆云垣於某時到

所言各異後不知所往

宋

劉德仁

滄州人始生有光照一室及長讀書通大義靖康初徙居鹽山有老者授以道德要言自

是元學大進金大定中賜號東嶽真人

正定府

周

昌

客

常山道人自稱殷王子食蓬蘽根年二百餘
顏色如二十許人嘗取紫草賣染家以錢遺

寡孤

隋

寶

公

隋開皇中居真定解慧寺嘗礱石為柱作門
三楹上為樓坐卧其上後寇來縱火焚至寺
寶公從樓墮身而下毫髮無傷衆寇刃之刀
自斷寇又舉火焚樓火自滅羣寇驚拜而去

唐

毗盧遮那

行唐人曾入毗盧山修行不知所終至唐時
嘗現形山上人見之遂於山下立祠祀之

張果

居恒山蒲吾縣得長生秘術武后遣使召之即死後復見恒山中元宗遣中書舍人徐嶠

齋璽書延至集賢院親商治道神仙事欲以玉真公主降之固辭還山賜號通元先生

義

元

居鎮州臨濟寺叅黃蘗大愚冥心元悟咸通八年示寂塔曰澄虛雍正十二年奉

特旨加封真常慧照禪師
賜祭一次

宋

守

干

藁城人居龍興寺性聰慧無幽不燭元祐間賜號通照大師一日發囊以紙衣一襲付其

徒至旬乃易衣誦梵經合掌加額辭衆而逝

蘇澄隱

真定人為道士住龍興觀得養生之術年八十餘不衰老太祖征太原還召見問其術對

曰臣之養生不過精思煉氣耳帝王養生即異於是老子曰我無為而民自化我無欲而民自正黃帝唐堯享國永久得此道也上大悅年百歲而卒

懷

丙

真定人巧思出天性郡有木浮圖十三級久而中級大柱壞欲西北傾他匠莫能為丙別作柱命衆工維而上已而却衆工以一介自從閉戶良久易柱下趙州洩河石橋銘鐵貫其中歲久鄉民多盜鑿鐵橋欲斂側計千夫莫能正丙不役衆工以術正之使復故宋時賜紫衣

順德府

晉

佛圖澄

從石勒游多幻術今順德府多其遺蹟

南北朝宋

竺道生

鉅鹿人生而穎悟依沙門年十五便登講座老僧莫敢酬抗宗太祖深加歎重尋入吳之

虎邱山聚石為徒講涅槃經石皆點頭後入廬山升法座而卒

廣平府

唐

潘師正

宗城人隱居嵩山逍遙谷高宗幸東都召見之問所須對曰茂松清泉臣所須也高宗甚

尊異之詔即其廬作觀時太常獻新樂遂更名祈僊望僊翹僊等曲卒年九十八謚曰體元先生

金

蕭淨興

宗城人初入道九年不語既語能解文義人有請必先知之明昌二載帝晝寢忽夢一僊

姑駕鶴而來狀貌清古與論神仙事帝驚覺擬像遣使求之使者未至前二十日已知其事矣明昌

六年羽化

明

韓太湖

號弘陽曲周第二疇人早歲未嘗知書自能解醫於北禪曹溪洞得真人口訣靜修數年

著明心經救苦懺文若干卷勅封正德明醫真人經懺刊行於世天啟元年印造頌行人稱為弘陽

教祖

大名府

唐

一行

張公謹孫自幼聰黠師事普寂禪師出家嵩山見高僧盧鴻文一覽成誦後窮大衍歷數

得其精妙唐元宗聞之召問曰卿何能對曰善記覽卽以宮人籍示之覽畢如素所習讀元宗呼為聖人漢洛下閭造大衍歷云歷八百歲當差一日有聖人出而定之一行當其期乃造大衍歷而正其差謬卒謚大慧禪師

明

王曰鈐

開州人生而記憶兩世事博通經史尤精於春秋後棄舉子業悉心內典大有玄悟時或

口占自述如蘆花兩岸雪江水一天秋鐵牛耕破扶桑國迸出金烏照海門人皆傳頌之號鮒鰕山

人入號蓮舟居士萬歷十七年對人言明春當化去果應之所著有心經註疏金剛經註疏行世

善

岩

開州人姓宋氏少習舉業不就遂厭棄塵囂落髮州之雲峰寺能詩與縉紳相唱和徧遊

終南五臺武當諸勝還魏掛錫郡城普照寺建白雲窩繙閱經藏不窺庭宇定息十餘年一日示偈曰樹倒藤枯是去年了然無法與人傳雲收雨霽山嵐靜萬古長空一月圓遂坐化有翠峰詩集行世

宣化府

唐

李

球

上谷人寶歷二年遊五臺山有風穴遊人稍誼呼及投物即大風震發揭屋拔木登山者

相戒不敢犯球戲投巨石於中果奔風迅發有一
木如桂隨風出球力扳其木墜入穴中見一人形
如獅子而人語引球入洞中見二道士問球所修
之道球無以為對道士詰責引者令速引去以一
杯水令飲訖引至洞側示以別路曰此有北巖之
境可得還人間解藥三九與之謂球曰如見異物
以藥指之不為害食之可以無病球行洞中黑處
藥有光如火數有巨蛇張口向球以藥指之伏不
敢動出洞門古樹半朽洞欲堙塞球摧壞土朽
樹久之方得出乃銳志修道與其子入王屋山
瑕邱仲寧人也少結廬大翻山中日採藥修合自服
久之出山去數百里市藥爭持錢米至不問
多寡輒予病無不愈者殆百餘年一日寧谷地震
宅舍傾頽仲與比鄰數十家同被壓死或取仲尸
棄水中收其藥市之俄見仲披羊裘拍手至大呼
曰爾利我藥何以棄吾尸也棄尸者俱不知所為

仲笑曰吾不汝恨第令世人知吾若此月吾今去矣後年餘或見其自北乘車至甯北方人謂之謫仙

普

真

之北走見其無怖意怪問之真曰南北俱可

生死俱可何怖為遂策而釋之兵退棄產室入金剛山修行採藥又施予病者病者得藥輒生禪定久之乃得先知術一日呼其徒詭曰施主至矣可具飲饌令豐潔己而賊數人入寺乃親為設几請必饜足仍啟扃出所貯米粟恣意取之賊携所取者出則環走山麓詰旦尚不能就塗大加畏服盡以歸還且伏堂下乞宥罪真笑曰物有定分若輩毋復為此拜謝而去

鄺希誠

則無有卅角時惇重不戲丰儀偉然推耄罔

最慢年十五決意入道師事毛希悰悰將逝以法授之嘗詣岱嶽屬時亢旱吏民以請希誠曰若等改過思善則甘澤可期皆再拜曰諾因取棕扇蔽面雲起所坐之方雨隨對還矯居水峪值大雨雹即起而禱雹立止此境不為災憲宗四年賜號太元真人

明

僧德綜

嘗遊夔居延慶應夢禪林禁足日朗誦法華內典富家資給有贏積輒募工修通濟橋及

靈照寺人咸高其行潔嘉靖辛丑道士張雄以幻術聚衆清峰岩為亂脅綜入其黨綜罵曰聖朝容我輩脫賦役為閒人不為國祝釐乃倡亂作賊貽禍不細矣雄令縛出就斬綜曰我以善死死猶不死汝以惡存死不旋踵遂遇害

易州

元

謝德富

易縣人七歲慕浮圖法禮興隆寺真空為師號辨大師皇慶初萬山和尚奉旨大作齋會

請師演法大衆咸集升堂授偈忽從法座大放光明良久方滅及示寂白光四達得舍利數粒

冀州

唐

邊洞元

東強人自幼於紫雲觀出家修行後得道白日上升唐元宗御製詞褒揚之碑刻尚存於

觀

大耳禪師

不知何許人唐開元間居南宮普彤寺建

定月餘不出人見其塔頂危坐云

趙州

漢

琴

高

趙人為宗舍人入水不濡遊冀州涿郡二百餘年一日率衆入涿水中他日乘赤鯉而過

其弟子皆見之

唐

從

諡

居趙州栢林寺精心元悟受法南泉仰可乾寧中示寂世號趙州和尚雍正十一年

特旨加封圓證直指真際禪師
賜祭一次

宋

張惠明

趙州人結廬中條山宋太宗詔入
內殿封妙濟禪師尋至西嶽仙去

定州

唐

劉商

中山靖王之後歷官合淝令篤好方術卜居
武康上疆山下有樵夫鬻米商厚償致之偶

步林間聞有人語曰中山劉商今日賜汝真米矣
視之杳無人奔歸取米修而服之月餘齒髮益盛
貌如嬰童舉步輕速可及馳馬又月餘坐知四方
之事乃入上疆洞中咸通初留一圖於酒家乘鶴

而去

宋

崇

辯修行中山弟子甚衆一日謂弟子曰吾行業已滿當歸佛道遂化弟子撫其尸則柔軟始

知為尸解去

明

東峰長老

深澤人洪武初入興果寺為僧年九十餘一日遍告諸舊遊曰吾以某年某月某日

歸矣歷數至期觀者萬人乃對大衆作偈遂入塔闔門而逝其未入時語鄰人權某者曰吾素好食黍糗可取與吾食權某抵家取之未至遇諸塗見其杖錫如生與之糗握手不言而去

畿輔通志卷八十五